

Veronica Lorenz l'é la Soreghina 2010

La joena de 18 egn da Vich portarà dant sia pruma encèria desche ambasciadora de la Marcialonga a la garejèda de corsa en program ai 6 de setember



L grop de la candidates con l president Alfredo Weiss e la ex Soreghines Carlotta Nemela e Eleonora Detomas.

L'é stat en jebia ai 30 de messèl jun Navalge a Moena, l'apuntament con la set candidèdes che aea i requisic domané per poder doventèr ambasciadores de la Marcialonga e che se aea scrit ite per tor pèrt al concors per la Soreghina 2010.

La selezion é stata fata tel cors de na serèda gustégola, averta con de bie bai porté dant dal Zenter Danza Tieser 2000 co la coreografies de Angela Deflorian, che ge à dapò lascià l post a la paroles del president de la Marcialonga Alfredo Weiss, del Scarie de la Comunità de Fiem Giuseppe Zorzi e de l'ombolt da Moena Riccardo Franceschetti.

Mingol de legrezza e gaissa é ruèdes ence dal salut de la Soreghina 2009 Francesca Braitto, che l'à contà mingol de chest so an da ambasciadora; "chesta ocasion me à dat l met de fèr de bela esperienzes che se no de segur no aesse podù fèr" l'à dit ge fajan i augures a duta la bezes che tolea pèrt a la selezion de chest an.

No l'é stat sorì cerner fora la neva Soreghina da pèrt de la juria che tolea ite l president Alfredo Weiss, l giornalista de la Rai Lorenzo Lucianer, l campion Marco Cattaneo, i raprezentanc del Comun de Moena Cristina Donei e

Giancarlo Ramus, l raprezentant de l'Itas Alan Barbolini e de la Sociazion Albergadores Giuliana Zeni, l president de l'APT de Fascia Andrea Weiss e l scarie Giuseppe Zorzi.

La set bezes é states chiamèdes una a l'outa dal prejentador de la serèda Antonio Vanzetta, che à let jù sie curriculum e ge a fat vèlch domana a vigniuna: l'era la doi fiamaces Daniela Ciaghi e Michela Gilmozzi e la 5 fascènes Marta Crepaz da Poza, Cristina Lorenz e Veronica Lorenz da Vich, Giorgia Lorenz da Cianacei e Laura Senettin



Veronica Lorenz, Soreghina 2010.
(foto Newspaper Canon)

da Moena.

A la fin la neva ambasciadora de la Marcialonga per l 2010 l'é stat nominà la joena Veronica Lorenz de Meca da Vich de 18 egn. L'ultima Soreghina fascèna, l'era stat Martina Bernard del 2006 e chest an l'era de bona probabilitèdes che l titol rue danef te noscia val, ajache sun 7 candidates 5 les vegnìa da Fascia.

Veronica l'é na studenta che à fat l quarto an al liceo scientifich a direzion linguistica de Fascia, la rejona delvers ingleis e todesch e la é dò che la empèra l rus; l'à studià tecnches de projetazion de siti web e l'à tout pèrt a n cors de marketing e promozion de la doi valèdes dolomitiches. La é n muie sportiva: da 10 egn la fèsc bal sui fères a livel agonistich, olache l'à vent ence garejèdes internazionèles, e amò apede la va coi schi, col snowboard, la fèsc tennis e danza e la é volontèra de la Crousc Checena tel grop di pionieres. A la fin de la serèda jun Navalge Alan Barbolini ge à consegnà a Veronica l premie de l'Itas e Giuseppe Zorzi la fascia de "Soreghina" e l collier de òr sport da la Magnifica Comunità.

L prum apuntament per Veronica te sia neva encèria sarà ai 6 de setember, en ocasion de la Marcialonga Running.